



Sesida dals

Communitgà ils

Protocol nr.

18 da favrer 2025

20 da favrer 2025

90/2025

Incumbensa Biert

concernent scolas da chant e da musica

Resposta da la Regenza

L'incumbensa Biert pretenda da midar l'art. 16 al. 2 da l'Ordinaziun tar la Lescha davart la promoziun da la cultura (Ordinaziun davart la promoziun da la cultura, OPC; DG 494.310) en quel senn, ch'ina unitad d'instrucziun imputabla vegn reducida da 60 a 45 minutas.

Per las scolas da chant e da musica èn cumpetentas las vischnancas (art. 17 al. 1 da la Lescha davart la promoziun da la cultura [LPC; DG 494.300]). A las scolas da chant e da musica che vegnan manadas da las vischnancas u per incumbensa da las vischnancas, paja il chantun ina contribuziun da 30 pertschient dals custs imputabels (art. 19 al. 1 e 2 LPC).

En il rom da la revisiun totala da la LPC èsi vegnì fixà en l'art. 18 al. 2 LPC, che la salarisaziun minimala ed il dumber d'unitads d'instrucziun per las personas d'instrucziun da chant e da musica correspundian – en cas d'in pensum cumplain – a las prescripziuns per las personas d'instrucziun da la scola primara tenor la Lescha davart las scolas popularas dal chantun Grischun (Lescha da scola, DG 421.000). En la missiva tar la revisiun totala da la LPC (missiva carnet nr. 10/2016-2017, p. 649) eri menziunà, che la durada da las unitads d'instrucziun vegnia reglada en las disposiziuns executivas e ch'i saja previs da fixar las unitads d'instrucziun a 60 minutas, sco en la regulaziun cumprovada vertenta. En l'art. 16 al. 2 OPC è l'unitad d'instrucziun imputabla lura er vegnida fixada a 60 minutas.

Las scolas da chant e da musica vegnan finanziadas tras contribuziuns da las vischnancas e dal chantun sco er tras tariffas da la scola da musica resp. tras contribuziuns dals geniturs. Sche las unitads d'instrucziun vegnissan reducidas a 45 minutas, avess quai consequenzas per la structura da finanziaziun da las scolas da musica. Las consequenzas finanzialas concretas per las vischnancas sco er per ils geniturs na pon actualmain betg vegnir quantifitgadas. Senza in'analisa detagliada (che cumpiglia tranter auter er ina cumparegliaziun interchantunala) n'èsi perquai betg convenient d'adattar l'art. 16 al. 2 OPC.

A partir da l'onn 2026 surpiglia l'Uffizi da cultura, partiziun Promoziun da la cultura, l'execuziun da las contribuziuns per las scolas da chant e da musica. En questa midada da la cumpetenza vesa la Regenza l'ocasiun da far – ensemen cun l'Associaziun da las scolas da chant e musica dal Grischun (ACMG) sco er cun autras acturas ed auters acturs relevants – in'analisa cumplessiva da las structuras d'instrucziun e da las consequenzas finanzialas. Ils resultats da l'analisa duain gidar ad identifitgar potenzials d'optimaziun ed a stgaffir basas da decisiun fundadas.

Sa basond sin questas explicaziuns propona la Regenza al Cussegl grond da midar questa incumbensa sco suonda: La Regenza fa – sut l'egida da l'Uffizi da cultura ed en collavuraziun cun las vischnancas grischunas, cun la ACMG sco er cun autras acturas ed auters acturs relevants – in'analisa cumplessiva da las structuras d'instrucziun e da las consequenzas finanzialas per las scolas da chant e da musica.



En num da la Regenza

Il president:

Marcus Caduff

Il chancelier:

Daniel Spadin